

## **MEMANG WAJAR KERAJAAN BERI KEUTAMAAN BANTU GOLONGAN B40**

Oleh: Noormizati binti Adenan, 1171092

Fakulti Pengajian Bahasa Utama (FPBU), Universiti Sains Islam Malaysia (USIM)

*Disiarkan pada 6 April 2020*

Baru-baru ini tular dalam media sosial tentang luahan usahawan wanita, Vivy Yusof berhubung Pakej Rangsangan Ekonomi Prihatin Rakyat (Prihatin) yang didakwa lebih mengutamakan golongan berpendapatan rendah atau B40.

Beliau menyuarakan kebimbangan tentang nasib golongan usahawan khususnya yang bergiat dalam perusahaan kecil dan sederhana (PKS) dalam menangani impak ekonomi yang dicituskan oleh pandemik COVID-19 sekiranya mereka tidak dibantu oleh kerajaan.

Walaupun kebimbangan Vivy itu mungkin berasas, beliau dan usahawan-usahawan lain seharusnya sedar mengapa kerajaan mendahulukan golongan B40 dari segi penyaluran bantuan Prihatin.

Statistik Penyiasatan Pendapatan Isi Rumah dan Kemudahan Asas (PPIR & KA), Jabatan Perangkaan Malaysia yang diterbitkan pada tahun 2017 menyatakan, terdapat kira-kira 6.9 juta isi rumah di bawah kategori B40 atau kumpulan dengan pendapatan 40 peratus terendah.

Mereka beroleh pendapatan purata di bawah RM4,000 sebulan. Sebahagian besar daripada mereka terjejas teruk dari segi kewangan berikutan pelaksanaan Perintah Kawalan Pergerakan (PKP) yang menyaksikan banyak premis perniagaan tidak dapat beroperasi seperti biasa.

Ramai yang tidak dapat bekerja apabila perniagaan yang bukan dalam kategori penting seperti kedai runcit, pengangkutan awam dan farmasi ditutup sejak PKP bermula pada 18 Mac lalu. Peniaga dan penjaja kecil termasuk mereka yang menjual nasi lemak, kuih-muih dan sebagainya turut hilang sumber pendapatan.

Akibatnya, golongan B40 yang sebahagiannya memang merupakan penerima bantuan kebajikan daripada kerajaan dan asnaf yang menerima zakat tidak mempunyai wang cukup untuk membeli barangan keperluan asas khususnya makanan.

Maka, tidak hairanlah kerajaan pimpinan Perdana Menteri, Tan Sri Muhyiddin Yassin memberi keutamaan kepada golongan B40 memandangkan ada dalam kalangan mereka yang terpaksa bercuti tanpa gaji atau hilang pekerjaan berikutan pelaksanaan PKP.

Langkah itu bertepatan dengan maksud hadis Rasulullah SAW yang diriwayatkan oleh Imam Bukhari:

*“Seorang Muslim adalah saudara terhadap Muslim (yang lain), dia tidak boleh menganiaya dan tidak akan dianiaya oleh orang lain. Sesiapa yang melaksanakan hajat saudaranya, maka Allah SWT akan melaksanakan hajatnya. Sesiapa yang melapangkan kesusahan seseorang Muslim, maka Allah SWT akan melapangkan kesukarannya pada hari kiamat. Sesiapa yang menutup aib seseorang Muslim, maka Allah SWT akan menutup aibnya pada hari kiamat.”*

Justeru, pakej Prihatin yang diumumkan oleh kerajaan merupakan satu manifestasi terhadap komitmen kerajaan dalam membela nasib golongan B40 di negara ini. Selain bantuan kerajaan, terdapat pelbagai pertubuhan bukan kerajaan (NGO) seperti Pertubuhan Sukarelawan Muslim Malaysia yang menyalurkan sumbangan kepada golongan kurang berkemampuan.

Sewajarnya, semua pihak berlapang dada atas keprihatinan yang ditunjukkan oleh kerajaan terhadap golongan B40 yang sudah tentu berdepan dengan kesukaran apabila pendapatan mereka terjejas.



